

Ons glo in Jesus Christus wat deel is van die Drie-Enige God. Hy is God in mens-vorm en is ook die Seun van God. Jesus het op aarde gewoon om vir ons te wys dat Hy deel is van ons wêreld. Hy het aarde toe gekom om vir ons God se genade te verduidelik en om as 'n voorbeeld vir ons te leef. Hy moes mens word om God se Koninkryk vir ons sigbaar te maak en ook sodat Hy ons kan leer hoe om as Sy dissipels (volgelinge) te leef. **NB: Hy het nie net kom vertel van die verlossing wat God Drie-enig gee nie; Hy IS die Verlosser!**

LUISTER/LEES: Lukas 2:8-20

DIE SKAAPWAGTERS EN DIE ENGELE

⁸Daar was skaapwagters in daardie omgewing wat in die oop veld gebly en in die nag oor hulle skape wag gehou het. ⁹Meteens staan daar 'n engel van die Here by hulle, en die heerlijkheid van die Here het rondom hulle geskyn. Hulle het baie groot geskrik. ¹⁰Toe sê die engel vir hulle: "Moenie bang wees nie, want kyk, ek bring vir julle 'n goeie tyding van groot blydschap wat vir die hele volk bestem is. ¹¹Vandag is daar vir julle in die stad van Dawid die Verlosser gebore, Christus die Here! ¹²En dit is vir julle die teken: julle sal 'n kindjie vind wat in doeke toegedraai is en in 'n krip lê."

¹³Skielik was daar saam met die engel 'n menigte engele uit die hemel wat God prys en sê:

¹⁴"Eer aan God in die hoogste hemel,
en vrede op aarde
vir die mense in wie Hy 'n welbehae het!"

¹⁵Nadat die engele van hulle af weggegaan het na die hemel toe, sê die skaapwagters vir mekaar: "Kom ons gaan reguit Betlehem toe om te sien wat gebeur het, soos die Here dit aan ons bekend gemaak het." ¹⁶Hulle gaan toe haastig daarheen en kry vir Maria en Josef, en die Kindjie wat in die krip lê. ¹⁷Toe hulle Hom sien, het hulle vertel wat oor hierdie Kindjie aan hulle gesê is. ¹⁸Almal wat dit gehoor het, was verwonderd oor wat die skaapwagters hulle vertel het. ¹⁹Maria het alles wat gesê is, onthou en telkens weer by haarself daarvoor nagedink. ²⁰Die skaapwagters het toe teruggegaan terwyl hulle God loof en prys oor alles wat hulle gehoor en gesien het. Dit was alles net soos dit vir hulle gesê is.

BESPREEK (as Omgee-groei-groep) elkeen van die volgende punte/vrae:

- Hoekom sluit die manier waarop Jesus mens geword het arm skaapwagters, 'n eenvoudige stal en jong ouers in?
- In vers 11 noem die engel vir Jesus: "Die Verlosser" en "Christus, die Here". Wat beteken hierdie 2 titels vir jou?
- **Omkring al die emosie-woorde in verse 8-14.** Watter van hierdie woorde beskryf jou lewenservaring tans? Wat beteken dit vir jou dat Jesus mens geword het en jou emosies verstaan?
- **Watter werkwoorde** word gebruik in verse 15-20? Watter wenke gee dit vir jou oor hoe Jesus jou lewe kan vorm?
- **Watter beeld sal jy gebruik** om aan iemand te verduidelik dat Jesus terselfdertyd mens én God was op aarde?

DOEN (tuis op eie):

Die wonder van Jesus se geboorte is iets wat ons dikwels slegs oor Kersfees vier. Al is dit Maartmaand: speel 'n Kersfees CD, sing 'n paar Kersliedere of hou 'n kersete om te onthou dat ons elke dag Jesus se menswording moet vier.

BID (as Omgee-groei-groep):

Bid o.a. vir die weeklikse gebedsaak soos bo-aan die afkondigingblaadjie aangedui

(Bostaande is vanaf <http://www.onglo.co.za/2017/03/06/1-jesus-christus/> oorgeneem en aangepas)